

## **Pangasinan - Maispiritun Labanan Masanton Sulat - SW Intro Scriptures**

**Lucas 17:5 Inkuanda ray apostol ed Katawan, "Pabiskeg moy pananisia mi."**

**Roma 10:17 Kanyan say pananisia manlalapud pandengel na balita, tan say balita onsasabi diad panamegley na pampulong na nipaakar ed Cristo.**

**Lucas 11:1 Aminsan, mampipikasi si Jesus ed sakey a pasen. Nen asumpal, inkuan na sakey ed saray disipulo to, "Katawan, ibangat mo kami pan mampikasi, a singa impangibangat nen Juan ed saray disipulo to."**

**1 Timoteo 2:1-4 Manonad amin, sirin, ipupurek ko a nisaklang komun ed Dios iray pikekerew, pikaksi, tagleey, tan pisasalamat para amin a katoowan. 2 Ontan met komun so nagawa para saray arari tan amin da ray manoley, pian makapambilay itayon anggapoy golo tan mareen, walay nagnap a kinasanto tan kasimpitan. 3 Saya et maung tan makapaliket ed Manangilaban tayon Dios, 4 a labay ton nilaban ya amin iray katoowan tan nakabatan day katwaan.**

**Zacarias 3:1,2 Diad sananey a pasingayew say Katawan impanengneng tod siak a manalalagey ed arap na anghil na Katawan si Josue a Pangulon Pari. Manalalagey met diman ed abay to si Satanas ya akaparaan lan mangakusa ed kinen Josue. 2 Samay anghil na Katawan kuantod kinen Satanas, Dusaen ka komun na Katawan, sika Satanas! Dusaen ka komun na Katawan ya inaro to so Jerusalem. Sayan too et aliling toy sakey a pegpeg na kiew ya inalad kawalaay pool.**

**Efeso 6:12 Ta saray kalaban tayo et aliwa ran totoo, no ag ingen saray maoges ya ispiritual a pakayari ed mangatatawen a mundo, saray manoley, saray walay pakayari, tan saray panguloy mundo ed sayan ambilonget a panaon.**

**Efeso 6:10,11 Kaonuran, mampabiskeg kayo diad pikakasakey yod Katawan tan diad tulong na mabiskeg a pakayari to. 11 Amin ya armas ya iiter na Dios ed sikayo so isolung yo, pian nayarian yon labanay panamalingo na Diablo.**

**Efeso 6:13-17 Kanyan isolung yo la ra natay armas na Dios! No onsabi lad satay agew a maoges, nayarian yon labanan iray kalaban yo, tan kasumpal na pilaban yo, mabiskeg ki nin manalalagey. 14 Kanyan mamparaan kayo lawas; ibalkes yo so katwaan, isolung yoy katonungan a sanggay pagew yo, 15 tan isolung yoy sapatos ed sali yo a pamparaan ed pangipulong yoy Maung a Balitan mangiter na kareenan. 16 Bembenan yo lawas so pananisia a panangga tan pangerep ed amin a panan mandarlang ya ipapana na samay Maoges. 17 Isolung yon pinagkahilmít yo so kilalaban, tan ala yoy salitay Dios a sikatoy ispadan iiter na Ispiritu.**

**Hebreo 4:12 Ta mabilay tan mabiskeg so salitay Dios. Matdem nen say anggan anton ispada a nantopag so tarem; talusen to so angkad pansiyanay kamarerwa tan ispiritu, angkad panabetay langolangowan tan otek na**

**pokel. Sintinsiaan to ray kanunotan tan pilalek na saray katoowan.**

**Lucas 4:8 Inmebat si Jesus, "Ibabagay Masanton Sulat, 'Igalang moy Katawan a Dios mo, tan sikato labat so panlingkuran mo!"**

**Efeso 6:18 Gawa yo ra yan amin diad panamegley na pikaksi tan mikerew kayoy tulong na Dios. Mampikasi kayo lawas diad panangiwanwan na Ispiritu. Kanyan mamparaan kayo lawas tan ag ki ontotonda; ituloy yon ipikasi ray amin a totooy Dios.**

**1 Samuel 17:45-47 Inmebat si David, Onla kan milaban ed siak a sinkaawit moy ispada, doyuk, tan pika, balet onla ak ed sikan milaban diad ngaran na Katawan a Makapanyarin-amin, say Dios na saray sondalon Israelita a sinagyat mon milaban. 46 Diad sayan agew say Katawan iyawat to kad limak; taloen ta ka tan potuten koy olom. Saray bangkay da ray sondalon Filisteo et ipakan kod saray manok tan saray ayayep. Naamtaan ed satan na intiron mundo a say Israel et walay Dios to, 47 tan nanengneng na amin da ray wadya ya ag to nakaukolay ispada o pika diad pangyagel tod saray totoo to. Sikatoy mananalo ed bakal, tan ipasilong to kayod pakayari mi.**

**Lucas 10:17-20 Makakaliket a pinmawil ira may pitomplor tan duan disipulo.**

"Katawan," inkuanda, "pati saray dimonyo onuren da kami no iganggan mi ran onekal diad ngaran mo." 18 Inmebat si Jesus, "Anengneng koy Satanas a naplag a singa kirmat a nanlapud tawen! 19 Dengel kayo! Initdan ta kayoy pakaoley ya onggatin ed saray oleg tan alakdan, tan maneral na amin a pakayari nen Satanas. Anggapoy makarigsod sikayo. 20 Balet ag kayo manliliket lapud oonuren kayo ray maoges ya ispiritu. Manliket kayo ingen lapud nisulat ed tawen iray kangaranan yo."

**2 Corinto 10:3-5 Tuan mambibilay kami diad mundo, balet aliwan minumundoy getma mi ed pilalaban mi. 4 Saray ikakana min armas et aliwan minumundon armas, no ag ingen saray mabiskeg ya armas na Dios a paneral mid saray mabiskeg a tirinsira. Dederalen miy tila-tilan katonungan; 5 igegeba miy panagaatagey ya onsumlang ed kakabatay Dios. Pasusukoen miy balang kanunotan tan patotolukan mid Cristo.**

**2 Timoteo 1:7 Ta say Ispiritun inter na Dios ed sikatayo et ag to itayo pagmaliwen a matakot, no ag ta initdan to itayoy pakayari, panangaro, tan panagadya ed sikatayon dili.**

**Mateo 12:28,29 Say Ispiritu na Dios so mangiiter ed siak na pakayarin mamaekal ed saray dimonyo, tan sikato yay mamapaneknek a sinmabi lad sikayoy Panariay Dios. 29 "Anggapoy makaloob a mantakew ed abung na toon mabiskeg, likud no baluren to ni kasakbayan ton takewan. No abalur to la, sikato labat so pakaloob tod abung a mantakew.**

**Efeso 1:13 Ontan yo met, a nen nadngel yoy tuan salita, salanti say Maung a Balita ya angiter ed sikayoy kilalaban, anisia kayod Cristo, tan minarkaan kayoy Dios a kayaryan to diad impangiter tod sikayoy insipan ton Ispiritu Santo.**

**Gawgawa 19:6 Intatapew nen Pablo ray lima to ed sikara, et linmeleksab ed sikara so Ispiritu Santo, nansasalita ray nandoroman salita, tan nampropisiya ra.**

**Marcos 16:15-18** Inkuantod sikara, "Laka kayod intiron mundo tan ipulong yoy Maung a Balita ed amin a pinalsa. 16 Siopamay manisia tan nabinyagan, nilaban; siopamay ag manisia, nadusa. 17 Saray mananisia naitdan ira na saray tanda na pakayari: papawayen da ray dimonyo ed ngaran ko; mansalita ray nandoroman salita; 18 no mamemben iray oleg tan no oninom iray samal anggapoy mauges a nagawad sikara; tan onabig iray mansasakit a pangitapewan da ray lima ra."

**1 Juan 1:9** Balet no ipatwa tayod Dios iray kasalanan tayo, pirdonaen to ray kasalanan tayo tan gawaen to itayon malinis diad pangekal to ray amin a kaogsan ed bilay tayo, lapud sikato et matoor tan matonung.

**Exodo 20:5** Ag ka ondadakmomo odino mangigagalang ed saraya, ta siak, say Katawan a Dios mo, et maimon ak. Dusaen ko ray mamosul ed siak tan saray kabyangay boleg da ya angkad kumatlo tan kumapat a kailalakan.

**Salmo 109:17** Nilabay toy mangisamba kanyan nisamba met komun! Kabosul toy mamindision kanyan anggapo met komuy mamindision ed sikato!

**Huis 16:16** Inagew-agew ton tinepet lan tinepet ed kinen Samson. Sinmawan siansiay Samson tan naingungotan la,

**Efeso 4:26** No mampasnuk kayo, paliisan yoy pakapankasalanan yo, tan ag kayo mamapasnuk a sanagew.

**Roma 14:12** Ebatan sirin na balang sakey ed sikatayo so sikaton dili ed arap na Dios.

**1 Juan 2:23** Ta siopaman a mangipolisay ed Anak, ipopolisay to met so Ama; siopaman balet so mangaawat ed Anak walad sikato met so Ama.

**Juan 14:6** Inmebat si Jesus, "Siak so dalan, say katwaan, tan say bilay; anggapoy toon makaonlad Ama no ag diad panamegley ko.

**Mateo 11:28-30** "Dago kayod siak, amin yon nakekesawan ed panaawit yoy ambelat, ta pampainawaen ta kayo. 29 Sakbat yoy pakok tan manaral kayod siak, ta mayamo tan mapaabeba ak, et makapampainawa kayo. 30 Ta mainomay so ipasakbat kod sikayo, tan anlemew so ipaawit kod sikayo."

**2 Corinto 6:2** Ta ibabaga to, "Dinengel ta ka ed manepeg a panaon, tinulongan ta ka ed agew na panangilaban." Dengel kayo! Natan so manepeg ya oras a pangawat na panangasiy Dios! Natan so agew na kilalaban!

**Roma 10:13** Onung na ibabagay Masanton Sulat, "Siopamay ontawag ed ngaray Katawan, nilaban."